



GEDRAGSKODE VIR LEERLINGE VAN DIE HOËR LANDBOUSKOOL BOLAND

Deel 1

Etiekkode

Ek verbind my plegtig tot die Grondwet van die Republiek van Suid-Afrika, en ek onderneem om die reg en die regstelsel te respekteer, te onderhou en te bevorder.

Ek verbind my daartoe om:

- hierdie gedragkode en al die reëls en regulasies van Hoër Landbouskool Boland te gehoorsaam;
- hoë morele en etiese standaarde te handhaaf;
- daarna te streef dat my optrede altyd verantwoordelik en ter bevordering van die skool se goeie naam sal wees;
- my skoolwerk met ywer, pligsgetrouheid en toewyding te doen; en
- die nodige hoflikheid en respek teenoor alle personeel, medeleerlinge en besoekers te betoon.

Ek onderwerp my aan enige dissiplinêre maatreël indien ek sou versuim om enige bepaling of maatreël in die skool se gedragkode na te kom.

GETEKEN TE _____ OP HIERDIE _____ DAG

VAN _____ 20____

_____ (Geteken)

_____ (Naam en Van)



Deel 2

Gedragkode en -reëls

1. Inleiding

Hierdie dokument is die gedragkode van Hoër Landbouskool Boland en sy koshuise, soos die Beheerliggaam dit goedgekeur het. Die Beheerliggaam het die ouers, leerlinge en onderwysers van die skool oor die inhoud van die gedragkode geraadpleeg. Die gedragkode is opgestel in ooreenstemming met die toepaslike bepalings van die Grondwet van die Republiek van Suid-Afrika, Wet 108 van 1996; die Suid-Afrikaanse Skolewet, Wet 84 van 1996 ('die Skolewet'); die Wet op Nasionale Onderwysbeleid, Wet 27 van 1996; Riglyne vir Gedragkode vir Leerlinge (Algemene Kennisgewing 776 in Staatskoerant 18900 van 15 Mei 1998); die Regulasies met betrekking tot Apparate vir Dwelmtoetsing en die Prosedure wat gevolg moet word (GK 1140 in Staatskoerant 31417 van 19 September 2008); Regulasies vir Veiligheidsmaatreëls by Openbare Skole (GK 1040 in Staatskoerant 22754 van Oktober 2001, soos gewysig) en toepaslike provinsiale wetgewing.

2. Doel

Hoewel die Staat verplig bly om opvoeding beskikbaar en toeganklik te maak, moet dít aangevul word met die toewyding en verbintenis van verantwoordelike rolspelers, naamlik onderwysers, leerlinge en ouers. Hierdie gedragkode is bedoel om sodanige toewyding en verbintenis te bevorder.

Die doel van hierdie gedragkode is om 'n gedissiplineerde en doelgerigte skoolomgewing te vestig wat toegewy is aan die bevordering en handhawing van die gehalte van die leerproses.

Die gedragkode onderskryf die skool se missiestelling.

Leerlinge en hul ouers/voogde moet hulself van die skool se gedragkode en die bepalings daarvan vergewis. Sodra leerlinge by die skool en koshuis ingeskryf is, is hulle onderworpe aan die gedragkode, en moet hulle dit stiptelik nakom. Indien leerlinge die gedragkode oortree of minag, sal daar ooreenkomstig die dissiplinêre prosedure vir leerlinge teen hulle opgetree word.

3. Gedragkode - Algemene reëls

Die kategorie dissiplinêre optrede word in hakies aangedui.

- 3.1 Leerlinge sal hulle te alle tye as goeie ambassadeurs van die skool en ooreenkomstig die etiekkode van die skool gedra. (A)
- 3.2 Terwyl leerlinge in die skool se drag of enige gedeelte daarvan geklee is, wat voldoende is om hulle in die oë van die publiek met die skool te verbind, of terwyl leerlinge die skool verteenwoordig, hetsy direk of indirek, hetsy as deelnemers, ondersteuners, helpers, toeskouers of andersins, sal hulle hulself van enige gedrag weerhou wat die skool, personeel of hul medeleerlinge in 'n slegte lig kan stel en val hulle onder die bepalings soos in hierdie gedragkode uiteengesit. (B)

- 3.3 In hul wisselwerking met die skoolhoof, onderwysers en ander skool-, plaas- en koshuispersoneel, moet leerlinge te alle tye die nodige hofflikheid en respek betoon en hulle weerhou van optrede wat op oneerbiedigheid of opstandigheid neerkom. (A)
- 3.4 In hul wisselwerking met mekaar, moet leerlinge sover moontlik selfbeheersing aan die dag lê en wedersydse respek en verdraagsaamheid betoon. In die besonder moet leerlinge hulle weerhou van enige gedrag wat daarop gemik is om die fisiese, geestelike en morele welstand van enige ander leerder te skend, of wat daartoe kan aanleiding gee. Enige seksuele of onbehoorlike fisiese kontak tussen leerlinge op die skoolterrein of enige ander plek waar hulle as leerlinge van die skool uitgeken kan word, is streng verbode. (A)
- 3.5 'n Opvoeder van die skool sal oor dieselfde regte as 'n ouer beskik wat betref die beheer en dissipline van die leerder volgens die gedragskode, sowel gedurende die leerder se skoolbywoning as gedurende enige skoolaktiwiteit.
- 3.6 Leerlinge mag nie in die klaskamer, saal of rekenaarlokale eet of drink nie. Die kou van kougom gedurende skoolaktiwiteite is verbode. (A)
- 3.7 Selfoongebruik gedurende onderrigperiodes en saalbyeenkomste is streng verbode, tensy die betrokke onderwyser in beheer tydens 'n spesifieke periode toestemming daarvoor verleen. Selfone mag onder geen omstandighede in enige eksamenlokaal ingeneem word nie – dit geld vir skryf- sowel as studiesessies. Leerlinge mag oproepe in noodgevalle maak vanaf die sekretaresse se kantoor vanaf die skool se telefoon. (A)
- 3.8 Die rook, besit en/of gebruik van tabakmiddels, die besit en/of gebruik van e-sigarette, drank, ander alkoholiese middels of bedwelmende middels op die skool- en koshuisterrein of gedurende enige skoolaktiwiteit of wanneer leerlinge in skooldrag geklee is, is verbode. (C)
- 3.9 In geval van 'n redelike vermoede dat leerlinge hulself aan 'n oortreding van hierdie gedragskode of die landswette skuldig gemaak het, het die skoolhoof of 'n opvoeder die reg om sodanige leerlinge en/of die eiendom in hul besit vir enige gevaarlike wapens, gewere, dwelms of ander skadelike en gevaarlike middels, gesteelde goedere of pornografiese materiaal te deursoek wat die leerlinge moontlik op die skoolterrein kon bring. Sodanige leerlinge se menswaardigheid sal deurentyd gerespekteer word, en dus sal die deursoeking privaat, deur persone van dieselfde geslag, en in die teenwoordigheid van nóg 'n persoon geskied. Die deursoekingsproses en -uitkoms moet opgeteken word.
- 3.10 Enige optrede wat die administrasie, dissipline of doeltreffendheid van die skool onbillik benadeel, sal as 'n oortreding van hierdie gedragskode beskou word. (B)
- 3.11 Skuldigbevinding deur 'n hof aan 'n strafregtelike oortreding sal as 'n oortreding van hierdie gedragskode beskou word. (C)
- 3.12 Oortredings wat tot skorsing en/of uitsetting kan lei, sluit in, maar is nie beperk nie tot: (C)
- optrede wat ander se veiligheid bedreig en wat die regte van ander skend;
 - die besit, dreigement of gebruik van gevaarlike wapens;

- die besit, gebruik, verhandeling of sigbare bewys van narkotiese of ongemagtigde dwelms insluitend toestelle wat gebruik word om ongemagtigde dwelms te gebruik, tabak- en elektroniese sigarette, alkohol en bedwelmende middels van enige aard;
- bakleiery, aanranding of mishandeling;
- onsedelike gedrag of 'n gevloek;
- die aanneem of voorhou van 'n vals identiteit;
- enige vorm van haatspraak, seksisme, rassisme of ander antisosiale gedrag;
- diefstal of die besit van gesteelde goedere, wat die diefstal of besit van toets- of eksamenvraestelle voor sodanige toets of eksamen insluit;
- onregmatige optrede teenoor en/of vandalisme, die vernietiging of beskadiging van skool- en koshuiseiendom wat die aanbring van graffiti sou insluit;
- oneerbiedigheid, aanstootlike gedrag en verbale mishandeling gerig teen onderwysers of ander skoolpersoneel of -leerlinge;
- herhaalde oortredings van skool- en/of koshuisreëls of hierdie gedragskode;
- strafregtelike en onderdrukkende gedrag, soos verkragting en geslagsgebaseerde teistering;
- viktimisasie, afknouery en intimidasie van ander leerlinge;
- die oortreding van eksamenreëls;
- opsetlike en bewuste verstrekking van vals inligting, of die vervalsing van;
- die gebruik van sosiale media om foto's, video's of enige ander inligting van enige ander leerder of personeellid te versprei sonder sy toestemming;
- verspreiding van pornografie en die kyk daarvan;
- die besit, verspreiding of gebruik van sintetiese dwelms of bedwelmende middels.

4. Klasreëls

- 4.1 Die klasopvoeder moet, ná oorleg met die klasleerlinge, klasreëls opstel wanneer hierdie gedragskode aanvaar word, en aan die begin van elke daaropvolgende skooljaar.
- 4.2 Die klasreëls moet skriftelik opgestel word en –
 - 4.2.1 onmiddellik by die skoolhoof ingedien word;
 - 4.2.2 in duidelik leesbare skrif op 'n prominente plek in die klaskamer aangebring word; en
 - 4.2.3 aan alle leerlinge beskikbaar gestel word.
- 4.3 Leerlinge moet stiptelik en volledig voldoen aan die klasreëls sowel as enige mondelinge opdragte wat die klasopvoeder of enige personeellid gee, en wat redelikerwys noodsaaklik is om hierdie gedragskode uit te voer en/of om die skool behoorlik en professioneel te bestuur.
- 4.4 Enige oortreding van die klasreëls sal as 'n oortreding van hierdie gedragskode en skoolreëls beskou word. (B)

5. Reëls met betrekking tot voorkoms en skooldrag

5.1 Skooldrag (A)

5.1.1 Die voorgeskrewe skooldrag moet gedurende skoolure én ander skoolaktiwiteite soos wat die Beheerliggaam bepaal, gedra word.

5.1.2 Skooldrag moet altyd skoon en netjies wees. Wat onderhemde betref, mag seuns slegs 'n effekleurige, wit onderhemp dra.

5.1.3 Kleredragreëls

- 5.1.3.1 Somersdrag - Wit kortmouhemp met die skoolwapen op die sak.
- Grys kortbroek / langbroek
- Skoolsokkies
- Swart skooltoerygskoene (nie aanglipskoene of skoene met gespes nie)
- Skool oortrektrui
- 5.1.3.2 Wintersdrag - Wit langmou- of kortmouhemp
- Grys kort- of langbroek
- Skoolsokkies
- Swart skooltoerygskoene (nie aanglipskoene of skoene met gespes nie)
- Skoolbaadjie
- Opsioneel: trui onder baadjie
- Skooldas
- 5.1.3.3 Uitstappies - Altyd baadjie en das (Uitsonderings kan met die hoof gereël word.)
- 5.1.3.4 Plaas - Oorpak
- 5.1.3.5 Sportdrag (Moet 'n skoolsweetpak hê. Word vir verskeie geleenthede gebruik)
Rugby: Weg: Skoolklere.
Tuis: Skoolklere na wedstryd
Skoolklere of sweetpak voor die wedstryd indien eerste wedstryd van die dag.
Ander: Sportdrag tuis en weg
- Atletiek: Boland Landbou-atletiekfrokke en swart kortbroek
- Golf: Boland Landbou-sporthemp en beige langbroek.
- Krieket: Boland Landbou-sporthemp en wit langbroek.

Tennis:	Boland Landbou-sporthemp en swart kortbroek
Jeugskou:	Boland Landbou-sporthemp, jean en wit waterskoene

Sportdrag is beskikbaar by die Boland Klerewinkel.

5.2 Voorkoms (A)

- 5.2.1 Die leerlinge se hare:
- moet kort, skoon en netjies versorg wees;
 - : mag nie kaalgeskeer wees nie;
 - : mag nie aan die kraag van die hemp raak nie;
 - : mag nie die leerling se sig belemmer nie;
 - : mag nie gekleur word nie;
 - : mag nie buitensporig gesny wees nie;
 - : verhouding tussen kante en bokant moet aanvaarbaar wees en nie 'n "step" vorm nie;
 - : geen smeermiddels nie;
 - : mag nie oor ore groei nie;
 - : mag nie met 'n korter kam as 'n nr 4 gesny word nie;
 - : geen dekoratiewe lyne of snitte word toegelaat nie

5.2.2 Geen bakkebaard word onder die middel van die oor toegelaat nie.

5.2.3 Die leerling se gesig moet te alle tye skoon geskeer wees.

5.2.4 Geen oorbelle, kettings, ringe **of enige vorm van armbande** word toegelaat nie.

5.2.5 Leerlinge se tasse moet stewig wees (nie vissak-tipe) en mag nie enige graffiti op hê nie.

5.2.6 Sien aanhegsel rakende prosedure vir haarinspeksie.

5.2.7 Voorkoms

5.2.7.1 Geen musse, serpe of hoofbedekkings buiten dié wat in die kleredragreëls voorgeskryf word, mag gedra word nie.

5.2.7.2 Juwele

- Geen juwele, soos ringe, armbande (rekkies óf leer) of kettings, word toegelaat nie.
- Slegs polshorlosies word toegelaat.
- Die dra van liggaamsjuwele, soos neus-, tong- en wenkbroujuwele, is verbode.

6. Koshuis

6.1 Gedrag in koshuis

- 6.1.1 Geen onnodige luidrugtigheid word geduld nie. (A)
- 6.1.2 Elektroniese instrumente moet nie onnodig hard wees nie. (A)
- 6.1.3 Geen balspele in of rondom koshuis. (A)
- 6.1.4 Niemand word in 'n ander se kamer as sy eie toegelaat sonder toestemming van die betrokke kamerbewoner nie. (A)
- 6.1.5 Geen water-gooiery in koshuis nie. (A)
- 6.1.6 Nie matrasse omdop nie. (A)
- 6.1.7 Mag nie met spykerskoene of rugbytoks in koshuis loop nie. (A)
- 6.1.8 Geen vandalisme. Enige toevallige breekskade moet dadelik aangemeld word. (B)
- 6.1.9 Niemand rook in die gebou nie. (C)
- 6.1.10 Leerders word nie in die koshuis tydens skoolure toegelaat sonder toestemming van die koshuisvader of onderwyser nie. (B)

6.2 Gedrag in kamers (A)

- 6.2.1 Geen meublement mag uit kamers verwyder word nie.
- 6.2.2 Geen yskaste, TV's, broodroosters, ketels, ens in die kamers toegelaat nie.
- 6.2.3 Prente slegs teen prentreëlings. Geen onweloweglike materiaal toegelaat nie.
- 6.2.4 Kamers moet netjies gehou word.
- 6.2.5 Geen drankbottels (vol of leeg) toegelaat nie. Geen drank of rookadvertensies teen mure nie.
- 6.2.6 Niemand mag aan 'n ander persoon se kluis vat nie.
- 6.2.7 Geen klere of handdoeke mag by vensters uithang nie.
- 6.2.8 Geen ma's , susters of vriendinne in die koshuis toegelaat nie. Hul word slegs na 'n vakansie in die kamers toegelaat om te help met die inrig van die kamer.
- 6.2.9 Nie meer as 3 aparate op 'n muurprop nie.

6.3 Gedrag in eetsaal (A)

- 6.3.1 Moet alle etes bywoon.
- 6.3.2 Altyd skoene aan voete hê.
- 6.3.3 In skooltyd, kom eet ontbyt met volle skooldrag aan.
- 6.3.4 Nooit hoed op in eetsaal nie.
- 6.3.5 Nie frokkie aan nie; hemp met moue.
- 6.3.6 Niemand in kombuis sonder toestemming nie.
- 6.3.7 Geen apparaat in die kombuis mag deur leerders gebruik word nie.
- 6.3.8 Geen kos rondgooi in eetsaal nie.
- 6.3.9 Eetgerei moet self verwyder word soos gereël.
- 6.3.10 Geen eetgerei mag uit die eetsaal verwyder word nie.

6.4 Gedrag tydens studietyd (A)

- 6.4.1 Met aanvang van studietyd sit leerling by sy lessenaar.
- 6.4.2 Geen selfoon naby nie.
- 6.4.3 Niemand loop rond of praat gedurende studietyd nie.
- 6.4.4 Akademiese boek voor leerder.

- 6.4.5 Die gebruik van enige elektroniese toestel of apparaat word nie toegelaat vir die gebruik om musiek te luister of films en reekse te kyk nie.
- 6.5 Optrede tydens siekte
 - 6.5.1 Leerling meld tydens ontbyt by personeeltafel aan. (B)
 - 6.5.2 Siek leerlinge mag slegs in eie kamer bly; nie na ander kamers toe gaan nie. (A)
 - 6.5.3 Mag nie aan enige buitemuurse aktiwiteite deelneem vir die dag wat hy siek is nie. (B)
- 6.6 Reëls vir naweke
 - 6.6.1 Teken vir die hele naweek in. Nie in en uit, tensy met onderwyser aan diens gereël is nie.
 - 6.6.2 Niemand neem matrasse uit kamers na ontspanningsaal nie.
 - 6.6.3 Gaan Sondag kerk toe.
- 6.7 Algemeen
 - 6.7.1 Geen leerling mag drank gebruik in die koshuis of onder die invloed van drank die gronde betree nie. (C)
 - 6.7.2 Dieselfde geld vir bedwelmende middels. (C)
 - 6.7.3 Geen aanstootlike leesstof of materiaal mag in 'n leerder se besit wees in die koshuis nie. (B)
 - 6.7.4 Niemand mag die terrein saam met enige iemand verlaat sonder die superintendent óf die onderwyser aan diens se toestemming nie. (C)
 - 6.7.5 Geen leerling van die senior koshuis mag in die junior koshuis kom nie. (B)
 - 6.7.6 Geen gr 8-leerder mag voor die derde kwartaal in die graad 12-gang kom nie. (B)
 - 6.7.7 Leerlinge wat Sondagaande inkom, moet voor 21:00 in wees.
 - 6.7.8 Geen leerling mag na 21:00 buite wees sonder toestemming nie.

7. Sport- en buitemuurse aktiwiteite

- 7.1 Deelnemers aan sport- en buitemuurse aktiwiteite
 - 7.1.1 Leerlinge wat gekies word om die skool as deelnemers in enige sport- of ander buitemuurse aktiwiteite te verteenwoordig, moet gedurende en ná deelname aan sodanige aktiwiteit in die sportdrag, skooldrag of ander voorgeskrewe drag geklee wees soos wat die opvoeder wat vir daardie aktiwiteit verantwoordelik is, bepaal.
 - 7.1.2 Alle leerlinge wat aan voormelde aktiwiteite deelneem, sal lojaal wees teenoor die skool en mededeelnemers. In die besonder moet deelnemers betyds en stiptelik by die plek aanmeld waar die aktiwiteit plaasvind of van waar deelnemers na die betrokke plek van deelname vertrek. Leerlinge wat gekies is om die skool in 'n aktiwiteit te verteenwoordig kan slegs van bywoning verskoon word indien 'n skriftelike verskoning vooraf aan die sport- of kultuurhoof oorhandig word. Onvermydelike afwesigheid van 'n aktiwiteit sal slegs verskoon word indien die sport- of kultuurhoof nie later nie as drie dae na afloop van die betrokke aktiwiteit 'n skriftelike verskoning ontvang. (B)

- 7.1.3 Leerlinge wat die skool by sportaktiwiteite verteenwoordig, sal te alle tye hoflik optree teenoor, en aan die beslissings, voorskrifte en opdragte voldoen van:
- 7.1.3.1 die sporthoof en die opvoeder wat by die bepaalde sport betrokke is;
 - 7.1.3.2 die skeidsregter of beoordelaar ten aansien van die betrokke aktiwiteit; en
 - 7.1.3.4 die spankaptein.
- 7.1.4 Alhoewel daar aanvaar word dat leerlinge wat aan sportaktiwiteite deelneem dit met oorgawe en volle inspanning doen, moet sodanige leerlinge steeds selfbeheersing en dissipline aan die dag lê. In die besonder moet leerlinge hulle van enige onsportiewe gedrag, vuil of beledigende taal, betrokkenheid in gevegte of voorvalle, of enige vuil of onbehoorlike spel weerhou.
- 7.2 Toeskouers en ondersteuners by sport- en ander buitemuurse aktiwiteite
- 7.2.1 Alle leerlinge wat enige skoolaktiwiteit as toeskouers of ondersteuners bywoon, sal, benewens die nakoming van die bepalinge van hierdie gedragskode, hulle van ontwrigtende, onbehoorlike, opstandige, onnodig opruiende of onbetaamlike gedrag weerhou. In die besonder mag leerlinge nie negatief op die beslissings van beoordelaars of skeidsregters reageer nie.
- 7.2.2 Leerlinge wat enige skoolaktiwiteit as toeskouers of ondersteuners bywoon, sal hulle onderwerp aan en neerlê by enige opdragte en aanwysings wat hulle voor, gedurende én na afloop van die betrokke aktiwiteit ontvang van die skoolhoof, enige opvoeder, lid van die Verteenwoordigende Raad van Leerlinge (VRL), ander skoolleiers, of ouers wat die skoolhoof aangestel het om met die vervoer, toesig of beheer van leerlinge te help wat na of van die betrokke aktiwiteit vervoer word, of dit bywoon. (B)
- 7.2.3 Bostaande reëls geld ook vir enige deelname aan enige ander buitemuurse aktiwiteite buiten sport, behalwe waar dit ooglopend nie van toepassing is nie.

8. Skooleiendom

- 8.1 'Skooleiendom' sluit die volgende in:
- 8.1.1 Die grond en geboue wat deur die skool en koshuis en boerdery beset word sowel as enige permanente aanhegting aan sodanige grond en geboue.
 - 8.1.2 Alle ander eiendom, wat toerusting, boeke, voorraad, motorvoertuie en dies meer insluit, wat die skool besit, huur of berg, of vir die beskadiging of verlies waarvan die skool wetlik aanspreeklik gehou kan word.
- 8.2 Aangesien die skool ontwikkel en opgerig is vir die gebruik van alle leerlinge wat daar skoolgaan, is alle leerlinge verplig om alles in hul vermoë te doen om die skool se eiendom te bewaar, sodat dit tot voordeel van alle huidige en toekomstige leerlinge van die skool gebruik kan word.

- 8.3 Geen leerder mag enige skooleiendom van die skoolperseel verwyder sonder die vooraftoestemming van die skoolhoof of 'n opvoeder van die skool nie. (B)
- 8.4 Leerlinge mag nie enige eiendom van die personeel van die skool, medeleerlinge, besoekers aan die skool, of lede van die publiek hanteer, beskadig, merk, skend of vernietig nie. Hierdie reël geld vir eiendom op die skoolterrein, in die onmiddellike omgewing van die skool, by of naby die plek van enige skoolaktiwiteit, sowel as enige voertuig waarmee leerlinge vervoer word en die eiendom daarop. (B)
- 8.5 Leerlinge mag nie enige skooleiendom beskadig, skend of vernietig nie. Enige leerder wat enige skooleiendom opsetlik misbruik, beskadig of verniel, moet dit vervang of daarvoor betaal. Vernietiging en/of beskadiging van eiendom is 'n strafbare oortreding. (C)

9. Die Verteenwoordigende Raad van Leerlinge (VRL) en skoolleiers

- 9.1 Die VRL en skoolleiers is saam met die personeel van die skool verantwoordelik vir algemene skoordisipline.
- 9.2 VRL-lede en ander skoolleiers moet leerlinge wat oortree na die personeel van die skool bring.
- 9.3 Alle leerlinge moet enige redelike voorskrif van 'n lid van die VRL of 'n ander skoolleier gehoorsaam, en moet die VRL en ander skoolleiers ondersteun en samewerking verleen in die behoorlike uitvoering van hul pligte.

10. Skoolkennisgewings

- 10.1 Alle leerlinge is verplig om alle kennisgewings wat die Beheerliggaam, skoolhoof of 'n opvoeder van die skool vir dié doel aan leerlinge uitreik, aan hul ouers te oorhandig, en om enige ontvangserkenning wat die ouers moet voltooi, stiptelik aan die klasopvoeder te voorsien.

11. Skoolwerk en huiswerk

- 11.1 Daar sal te alle tye 'n ordelike atmosfeer in die klaskamer heers. Leerlinge mag nie onderrig versteur of verhinder nie. (B)
- 11.2 Leerlinge moet klasopdragte stiptelik nakom. (A)
- 11.3 Alle leerlinge sal 'n huiswerkboek ingevolge die skoolhoof of klasopvoeder se voorskrifte hou en bywerk.
- 11.4 Leerlinge moet die voorgeskrewe huiswerk doen en dit stiptelik teen die bepaalde spertyd by die betrokke opvoeder indien. Versuim om aan hierdie reël te voldoen, kan slegs verskoon word indien die leerder op die dag waarop die huiswerk voltooi moes gewees het, voor die periode 'n aanvang neem, by die betrokke onderwyser verskoning aanbied oor hoekom die huiswerk nie gedoen is nie. (A)
- 11.5 Alle leerlinge moet hul voorgeskrewe skoolwerk met ywer, pligsgetrouheid en toewyding doen om sodoende 'n deurlopende werksetiek te ontwikkel. Versuim

om aan hierdie reël te voldoen, sonder 'n aanvaarbare verskoning, sal as 'n oortreding van hierdie reël beskou word.

- 11.6 Leerlinge is verplig om enige werk wat hulle misgeloop het, so spoedig moontlik in te haal.
- 11.7 Leerlinge beweeg vinnig in enkelgelid van die een klas na die volgende. Gesels in groepe of kleedkamerbesoeke gedurende klasruilings is nie toelaatbaar nie. Leerlinge mag wel saggies in die gange met mekaar gesels terwyl klasse gewissel word.

12. Toetse en eksamens

- 12.1 Alle leerlinge is verplig om hulle aan die toetse en eksamens wat deur die onderwysers aan hulle opgedra word, te onderwerp. Versuim om aan hierdie reël te voldoen, sal slegs in uitsonderlike gevalle verskoon word, mits die ouers van die betrokke leerder op die vroeë moontlike geleentheid 'n volledige en aanvaarbare skriftelike verduideliking aan die skoolhoof oorhandig. (B)
- 12.2 Leerlinge moet hulle met die afneem van toetse of eksamens van enige vorm van oneerlikheid weerhou. (B)

13. Motorvoertuie en motorfietse

- 13.1 Leerlinge mag nie motorvoertuie of motorfietse op die skoolterrein bring nie, tensy hulle oor vooraf skriftelike toestemming beskik van die koshuissuperintendent, en tensy hulle stiptelik aan enige voorwaardes voldoen waaraan gemelde toestemming onderhewig kan wees. Indien 'n leerder nie in besit van sodanige toestemming is wanneer hy deur enige lid van die personeel, Beheerliggaam of VRL of 'n skoolleier versoek word om dit te toon nie, sal daar aanvaar word dat hy nie oor sodanige toestemming beskik nie, totdat hy die teendeel kan bewys. Geen motoraangedrewe voertuig wat aan die skool behoort, mag deur 'n leerling bestuur word nie, tensy met die skriftelike toestemming van die skoolhoof. (B)
- 13.2 Die bestuur van 'n motorvoertuig of motorfiets deur 'n leerder sodat dit 'n gevaar of moontlike nadeel vir ander leerlinge op die skoolterrein of ander leerlinge en lede van die publiek in die onmiddellike omgewing van die skoolterrein inhou, is streng verbode. (B)
- 13.3 Leerlinge sal te alle tye die verkeersreëls op en om die skoolterrein nakom.
- 13.4 Alle motorvoertuie, motorfietse en fietse word op eie risiko op die skoolterrein parkeer.

14. Stiptelikheid

- 14.1 Leerlinge sal op die bestemde tyd aan die begin van die skooldag en met die aanvang van enige ander skoolaktiwiteit opdaag. Wanneer leerlinge laat kom, moet hulle 'n skriftelike verskoning van hul ouers verskaf. Leerlinge wat laat opdaag, moet eers by die kantoor aanmeld voordat hulle na hul betrokke klas gaan. (A)

15. Afwesigheid van skool en koshuis

- 15.1 Leerlinge mag slegs in uitsonderlike gevalle afwesig wees van die skool, en dan ook slegs met die toestemming van die superintendent. (A)
- 15.2 Afwesigheid van die skool of 'n onderrigperiode sonder 'n aanvaarbare verskoning word as stokkiesdraaiery, wat streng verbode is, beskou. (B)
- 15.3 Leerlinge wat vir een tot drie agtereenvolgende dae van die skool afwesig is, moet met hul terugkeer 'n skriftelike verduideliking van hul ouers voorlê. Afwesigheid vir meer as drie agtereenvolgende dae sal slegs verskoon word indien 'n brief deur 'n geregistreerde mediese praktisyn voorgelê word, buiten in die geval van dood of trauma in die leerder se gesin of om 'n ander rede wat deur die skoolhoof goedgekeur word.
- 15.4 Leerlinge mag slegs die skoolgronde (plaas) verlaat met die nodige toestemming van die superintendent in samewerking met die ouers.

16. Omgewing

- 16.1 Leerlinge het die reg op 'n veilige omgewing en skool wat bevorderlik is vir opvoeding.
- 16.2 Leerlinge mag nie die skoolgronde of -geboue bemors nie.
- 16.3 Leerlinge wat toeskouers of ondersteuners by enige skoolaktiwiteit is, moet die terrein wat hulle beset, netjies en skoon agterlaat, en moet seker maak dat alle rommel opgeruim en in vullishouers geplaas word.
- 16.4 Leerlinge moet toilette skoon agterlaat.
- 16.5 Enige optrede of versuim deur leerlinge wat 'n gesondheidsgevaar vir ander leerlinge veroorsaak of moontlik kan veroorsaak, moet vermy word.
- 16.6 Geen slagspreuke (graffiti), plakkers, plakkate en dergelike dinge mag sonder die toestemming van die skoolhoof op enige oppervlak by die skool aangebring word nie.
- 16.7 Leerlinge moet gehoor gee aan die redelike opdragte van die skoolhoof, enige opvoeder, lid van die VRL of 'n ander skoolleier met betrekking tot die handhawing van 'n skoon en higiëniese skoolomgewing.
- 16.8 Alfons-woonbuurt is buite perke vir leerlinge van die skool. (B)

17. Vrystelling van bepalinge van die gedragskode

- 17.1 Leerlinge kan op kulturele, godsdienstige of mediese gronde skriftelik by die Beheerliggaam aansoek doen om algehele of gedeeltelike vrystelling van een of meer van die items wat in die gedragskode vervat is.
- 17.2 Sodanige aansoek moet volledige redes én stawende bewyse insluit. Die bewyslas rus dus op die leerder om die aansoek om vrystelling te staaf.
- 17.3 Aansoeke om vrystelling sal slegs aan die begin van elke skooljaar binne die eerste twee weke van die skooljaar ontvang en oorweeg word, tensy dringendheid of veranderende omstandighede aangevoer kan word.

- 17.4 In die oorweging van 'n aansoek om vrystelling sal die Beheerliggaam geregtig wees om enige inligting in te win wat hy vir 'n regverdigte beoordeling van die aansoek kan nodig ag.
- 17.5 Die Beheerliggaam sal die aansoek om vrystelling met die nodige erns en verantwoordelikheid, en binne die raamwerk van die Grondwet en hofuitsprake oorweeg, en die leerder skriftelik van sy besluit inlig.
18. In geval van die oortreding van enige bepaling in hierdie gedragskode of die skool se koshuisreëls, sal die voorgeskrewe dissiplinêre prosedure gevolg word.

Deel 3

Prosedure vir dissiplinêre optrede teen leerlinge

In geval van die oortreding van enige bepaling wat in die gedragskode vir leerlinge voorgeskryf word, moet hierdie dissiplinêre prosedure gevolg word. Vir die toepassing van hierdie dissiplinêre prosedure word wangedrag in drie kategorieë verdeel. Dit stem ooreen met die verskillende dissiplinêre stappe wat gedoen kan word en die verskillende prosedures wat gevolg kan word in die hantering van wangedrag.

Vir doeleindes van prosedurele aangeleenthede sal oortredings van koshuisreëls as oortredings van die gedragskode beskou word, en sal dieselfde prosedurele vereistes, met die nodige aanpassings na gelang van omstandighede, geld.

Enige verwysing na die Beheerliggaam in hierdie dissiplinêre prosedure sluit die dissiplinêre komitee van die Beheerliggaam in.

1. Dissiplinêre optrede

1.1 Minder ernstige oortredings

1.1.1 Kategorie A-wangedrag (Aangedui met 'n (A) in Gedragskode)

In geval van die oortreding van enige bepaling in hierdie kategorie, moet sodanige oortreding na 'n opvoeder van die skool verwys word, en is sodanige opvoeder by magte om toepaslike strafmaatreëls toe te pas.

1.1.2 Kategorie B-wangedrag (Aangedui met 'n (B) in Gedragskode)

In geval van die oortreding van enige bepaling in hierdie kategorie, moet sodanige oortreding na die dissiplinêre komitee verwys word, en is die skoolhoof by magte om toepaslike strafmaatreëls toe te pas.

1.2 Ernstige oortredings

1.2.1 Kategorie C-wangedrag (Aangedui met 'n (C) in Gedragskode)

Hierdie kategorie sluit ook herhaalde kategorie A en B oortredings in.

In geval van die oortreding van enige bepaling in hierdie kategorie, moet sodanige oortreding na die Beheerliggaam verwys word, en is die Beheerliggaam by magte om die volgende strafmaatreëls toe te pas:

- a) Enige van die strafmaatreëls in 1.1.1(a) tot (d) en 1.1.2(b) tot (e) hier bo, waartoe die volgende bygevoeg kan word:
- b) In geval van die oortreding van die gedragskode deur lede van die VRL en ander skoolleiers:

Saam met of as alternatief vir bogenoemde, skorsing van pligte vir 'n tydperk van tot ses weke, of afdanking en permanente verwydering uit die VRL of 'n ander leiersamp in die skool
- c) Na afloop van 'n verhoor waarin enige leerder skuldig bevind is aan die oortreding van die bepalings van die gedragskode, kan die Beheerliggaam sodanige leerder enige van voormelde strawwe oplê, of die leerder skors, of by die Onderwyshoof aanbeveel dat die leerder uit die skool uitgesit word.

1.2.2 Indien daar op slegs skorsing uit die skool as 'n straf besluit word, kan die Beheerliggaam die leerder vir tot sewe skooldae skors.

1.2.3 Indien die Beheerliggaam besluit om die uitsetting van die leerder by die Onderwyshoof aan te beveel kan die Beheerliggaam die leerder vir 'n redelike tydperk van tot veertien skooldae skors, hangende die Onderwyshoof se beslissing.

1.2.4 Na afloop van 'n verhoor waarin enige leerder aan die oortreding van koshuisreëls skuldig bevind word, kan die Beheerliggaam sodanige leerder enige van voormelde strawwe oplê, of die leerder vir enige gepaste tydperk van koshuisinwoning skors, of die leerder uit die koshuis uitsit.

2. Voorkomende skorsing

Die Beheerliggaam kan, op redelike gronde en as 'n voorsorgmaatreël, 'n leerder wat vermoedelik ernstige wangedrag (kategorie C) gepleeg het, vir tot sewe skooldae van skoolbywoning skors, maar kan slegs sodanige skorsing oplê nadat die leerder 'n redelike geleentheid ontvang het om vertoë in verband met sodanige skorsing aan die Beheerliggaam te rig.

Deel 3

Prosedure rakende haarinspeksie

- Die leerders se hare word ongeveer elke drie weke nagegaan.
- Op die Donderdag of Vrydag voor die inspeksiedatum word die leerders in kennis gestel van die beplande inspeksie wat sal plaasvind op die daaropvolgende Dinsdag direk na die saalbyeenkoms. Dit gee die leerders kans om hulle hare oor die naweek te laat sny.
- Die Matriekraad sal help om die leerders te identifiseer wie se hare nie volgens die skool se beleid is nie.
- Die personeel verantwoordelik vir die voorkoms van die leerders, sal dan die leerders wat geïdentifiseer is ook nagaan, en indien nodig, hulle name afmerk wat gesny moet word.
- Die leerders wie se hare gesny moet word, het sewe(7) dae om toe te sien dat hulle hare volgens die skool se beleid gesny word, tensy dit totaal buitensporig gesny is.
- Tydens die daaropvolgende Dinsdag se 1ste studiebreuk in die koshuis, sal die afgemerkte leerders se hare deur die personeel verantwoordelik vir die voorkoms, nagegaan word. Indien enige leerder se hare nog steeds nie volgens die beleid van die skool is nie, sal daardie leerders nie in klasse toegelaat word voor hul hare nie gesny is nie.
- Aan die begin van elke kwartaal of nuwe skooljaar, sal die leerders se hare ook nagegaan word. Indien enige leerder se hare nie volgens die beleid van die skool is nie, sal die leerder dit dieselfde dag volgens die beleid van die skool moet sny. Indien dit die volgende dag nie volgens die beleid van die skool gesny is nie, sal daardie leerders nie in klasse toegelaat word voor hul hare nie gesny is nie.